

საქართველოს კანონი

საქართველოს ზოგიერთ საკანონმდებლო აქტში ცვლილებებისა და დამატებების შეტანის თაობაზე

1. „საქართველოს პარლამენტის წევრის სტატუსის შესახებ“ საქართველოს რესპუბლიკის კანონის (საქართველოს პარლამენტის უწყებები, 1992 წ., №2, მუხ.130) მე-6 მუხლი ჩამოყალიბდეს შემდეგი რედაქციით:

„მუხლი 6. პარლამენტის წევრის საქმიანობა საარჩევნო ოლქში

პარლამენტის წევრი თავალყურს ადევნებს ხელისუფლებისა და მმართველობის ადგილობრივი ორგანოების საქმიანობას, პარლამენტის პოლიტიკის განხორციელებას ქვეყნის მთელ ტერიტორიაზე. ამ ამოცანების გადასაწყვეტად პარლამენტის წევრი იღებს მოქალაქეებს, ხვდება ამომრჩევლებს, ატარებს კონსულტაციებს ხელისუფლებისა და მმართველობის ადგილობრივ და ცენტრალურ ორგანოთა ხელმძღვანელობასთან, პოლიტიკური და საზოგადოებრივი ორგანიზაციების წარმომადგენლებთან.

მაჟორიტარული წესით არჩეული პარლამენტის წევრისათვის ამ საქმიანობაში ხელის შეწყობის მიზნით საარჩევნო ოლქის ცენტრში იქმნება პარლამენტის მაჟორიტარი წევრის ბიურო, რომლის ფუნქციები, ორგანიზაციისა და საქმიანობის წესი განისაზღვრება დებულებით, რომელსაც ამტკიცებს პარლამენტის თავმჯდომარე.

პარტიული სიით არჩეული პარლამენტის წევრის საქმიანობას საარჩევნო ოლქში საქართველოს პარლამენტი უზრუნველყოფს შესაბამისი პოლიტიკური წარმომადგენლობების მეშვეობით.

მმართველობის ცენტრალური და ადგილობრივი ორგანოები ვალდებული არიან საქართველოს პარლამენტის წევრის განცხადების საფუძველზე აღმოუჩინონ სხვა აუცილებელი დახმარება.“.

2. „მოქალაქეთა პოლიტიკური გაერთიანებების შესახებ“ საქართველოს რესპუბლიკის კანონის (საქართველოს პარლამენტის უწყებები, 1991 წ., №8, მუხ. 591) მე-12 მუხლს დაემატოს შემდეგი შინაარსის მეოთხე ნაწილი:

„იმ პოლიტიკური პარტიების ფინანსური უზრუნველყოფისათვის, რომელთაც ჰყავთ პროპორციული წესით არჩეული წარმომადგენლები საქართველოს პარლამენტში, საქართველოს პარლამენტის ბიუჯეტიდან მიზნობრივი დანიშნულებით გამოიყოფა განსაზღვრული თანხა.“.

3. ეს კანონი ამოქმედდეს გამოქვეყნებისთანავე.

საქართველოს პრეზიდენტი

ედუარდ შევარდნაძე.

თბილისი,

1996 წლის 22 თებერვალი.

